



RIBA E CABEZ DI CLABO

BACCHANAL TABATA NADA MAS CU UN ESCANDALO

Conversando cu un bishitante, su wowo a cay riba e buki di carnaval "*Bacchanal*" y el a bisami: "*Bo no ta corda cu den nos tempo (40 pa 60 aña pasa) 'bacchanal' tabata significa nada otro cu un 'escandalo'.*"

"*Bringamento formal a tumu lugar na cas di Wewe. Esey tabata un bacchanal!*" Tur hende tabata zundra, y grita otro. Un bon fiesta tambe tabata un "*bacchanal*". Asina nos a bin repasa algun di e expresionnan di San Nicolas di e tempo ey.

Rafi tabata un "*ba-john*" (*of bad John*), un persona fresco of bruto, tambe e tabata un persona cu bo no por gana den nada. Y si Rafi tabata un persona cu ta bisti bon, e tabata un "*saga boy*". Awe ora bo bisa un persona cu Bruno ta un "*maco*", bo ta wordo yama "*onbeschoft*" mes ora.

Pero 60 pa 70 aña pasa na San Nicolas, un "*maco*" tabata un persona cu ta biba bida di otro, pa haci redashi. Si bo haya sota na cas of un bon bati den bringamento, bo a haya "*licks*" y ora bo topa cu bo amigonan, nan tur ta "*mamaguy*" bo. Tur ta haci cherche di bo. E palabra aki, "*mamagai*" si ta pega te ainda den nos papiamento.

Loke te ainda ta usa pa tanto ingles of papiamento ta: "*Eh?*" cu kiermeen "*kico*" (bo di)? "*Eh - eh*" loke ta: "*no, esey no*" ... Di otro banda tin tambe e "*Eh-heh?*" cu ta significa: "*Berdad?*" of "*mi ta compronde*", of "*si*".

Ora bo ta bay fiesta, bo no ta bay un party. Bo ta bay "*fête*".

Si bo ta gosando of celebrando, bo ta bisa cu "*Ah fetin*".

E "*ah*" ta bin dilanti den mayoria di caso cu mester bisa: "*I am*" (mi ta...).

Den expresionnan e "*g*" na final di e palabra hopi biaha ta keda afor tambe.

Na lugar di bisa "*fetting*" bo ta expresa "*fetitin*".

Pero bo tata, bo "*father*" ta bira "*faddah*" mescos cu bo "*moddah*" ora ta trata di bo "*mama*". E hendenan di Trinidad cu mi conoce den Lago Heights tempo nos tabata mucha, tabata usa "*mooma*".

Si un homber ta un homber "*sushi*" of "*no ta sirbi*" (por ta un muher tambe) e persona aki tabata un "*nastiness*", un expresion di

disgusto aplica pa un persona cu ta bon pa nada.

Si ta trata un persona cu wowo schil, e ta "*cock-eyed*" of "*cocki-eye*" y ora ta papia di "*boso*" of "*bosonan*", ta papia di "*allyuh*", pero si ta di boso hendenan, ta bisa "*you so*".

Na San Nicolas no tabata conoci e palabra "*spirit*". Nos ta papia di spirito na papiamento, pero nan tabata papia di "*jumbie*" y si bo kier expresa cu esey ta "*berdad*" bo ta expresa "*fuh true*" of "*fuh troot*". Si ta puntra bo ta puntra: Ta berdad? tambe bo ta expresa "*Fuh true?*"

Ta masha hopi di e expresionnan aki a bay perdi ultimo 30 aña.

Si e tempo ey bo tabata bati riba algo, bo no ta "*pound*". E palabra cu tabata wordo usa pa "*bati*" tabata "*pong*".

Mi "*tanta*" no tabata "*my aunt*". E tabata "*my anty*" of "*my tanty*".

Si bo mira un dama cu pecho bunita, of grandi, bo ta papia di su "*tot tots*".

Nos no a conoce sunglasses pa bril di solo. Nos a conoce "*shades*". Te awe tin hende ta papia di "*sun shades*".

Mangel tambe tabata tin su palabra special. Awe parce tur cos ta draai rond di "*candy*" pero e tempo ey tur mangel tabata "*sweets*" y nos tabata tin un "*sweetie*".

Cambioamento di un palabra of dos palabra y haci esakinan un palabra, tabata tumu lugar hopi. "*Whappen*" kier meen "*What happened*", kico a pasa? Pero ora ta puntra: "*kico ta pasando eynan?*" bo ta tende: "*Wha-happenin' dey*". "*Kico bo di?*" -- "*why yuh say?*" "*Unda?*" -- "*Whey*" Si algo a pasa cu bo y ta bo mes falta, no ta bisa: "*it's your own fault*", e expresion tabata: "*yuh look fuh dat*".

Nos tabata tin personanan sokete tambe y por bisa hasta personanan terco, y e personanan aki tabata un "*cunumunu*".

Carnaval no tabata carnival tampoco. Carnival tabata "*mas*".

Loke tabata sabroso tabata un tayo di "*callaloo*", local masha poco ta haya awe. Esakinan ta e blachinan di calalu traha den un stoba cu pampuna, coco, carni sala, y yambo. E yambo cu funchi mescla tabata e

"*coo-coo*" (cucu) cu tambe tabata hopi dushi. Hunto cu esaki bo tabata haya un bon "*mauby*". Un bebida refrescante mescla cu specerij cu ta un bebida tradicional caribense, cu masha poco ta haya awendia riba nos isla. E ta dushi -zuur, pero pa mi smaak, (mi no a guste tempo mi tabata mucha) e specerijnan tabata dañe. Ta na grandi mi a cuminza gust'e despues cu mi a beb'e na St. Maarten algún aña pasa.

Dushi di aya riba tabata e "*pelao*" cu awe nos ta yama "*fried rice*", pero e "*pelao*" tradicional mes tabata e aroz cu carni of galiña garna, cu su peas y sabor di coco y peper.

Masha popular te ainda ta e "*roti*". Pa e hendenan cu a bini di "*British Guyana*", (NOTA: B.G. - bee gee- awe ta djis "*Guyana*", e roti tabata e mansa lora. E guyanesnan aki tabata mas bien di descendiente indio. Pero nan a bin di Trinidad tambe, y e hendenan di otro islanan ingles den Caribe tambe tabata tin nan roti y no por laga afor *surinameñonan* cu nan roti tambe. Tabata tin diferente sorto di roti, esta dependiendo kico tin den e mansa. E "*skin roti*" ta e mansa so. Por a haya e asina yama "*dhalpurie roti*" (of *dalpurie*) cu peas of e "*potatote roti*" yama tambe e "*aloo roti*" dependiendo kende ta trahe, y tur di nan cu carni (of galiña) cu curry. Awe na Aruba ta haya *roti surinameo*, di Java, *Hindustan*, *Indio*, di *islanan caribense*, y cada un diferente. Pero pa un bon curry, pa mi semper a keda esun di e "*inglesnan*" manera nos tabata yama tur di nan.

Si sigui riba cuminda mi no ta bini cla, y mi no por sigui yena cu expresionnan na ingles di antes riba nos isla, principalmente den barionan di Zeewijk bay ariba te Lago Heights y Esso Heights y Juana Morto.

Pero si ta ripara awe cu e ingles di ayera, y tambe e asina yama "*village talk*" of "*savannah*", a bay hopi perdi riba nos isla, y ta e grandi nan so ta papia esaki ainda y ta un placer pa scucha nan y pa trata na compronde nan si bo no a tanta mey mey di nan.

"*Is toim to cera dis pida awe y meybie won dey oy will bolbe on dis topico.*"

Juby Naar